

## 開放文學 – 歷代筆記 – 夷堅甲志 卷第三

萬歲丹 徽州婺源縣懷金鄉民程彬·邀險牟利·儲藥害人·多殺蛇埋地中·覆之以苦·以水沃灌·久則蒸出菌蕈·彩而曝乾·復入它藥·始生者以食人即死·恐為累不敢用·多取其次者·先以飼蛙·視其躍多寡以為度·美其名為萬歲丹·愚民有欲死其仇者·以數千金密市之·嘗有客至欲置毒·誤中婦翁·翁歸而悟·已不可救·彬有弟曰正道·雅以為非·不敢諫·至徙家避諸數十里外·彬既老·始悔不復作·稍用偽物代之·藥既不驗·遂無售者·既死貧甚·唯一子·丐食道亡·其後遂絕·嘗有里胥督租·以語侵彬·彬怒毒而飲之·胥行未幾·腦痛嘔血·亟反臥其門·大呼乞命·彬汲水飲之即愈·蓋有物以解其毒也·縣人董猷說·

李辛償冤

宣和末·饒州庾人李辛·為吏凶橫·郡人仄目·因大雪入府治·一人遇諸涂·辛被酒恃力·奮拳擊死之·觀者如堵·恐累己·絕不言·辛捨去·街卒以為暴亡·呼其家人葬之·辛益放肆·所居在城外·夜多逾垣歸·經三歲·忽遇死者曰·吾尋汝久·乃在此邪·辛歸語其妻甚懼·明日死·辛家養數鹿·每以竹擊柱·則應聲而至·戶曹白生·以七月勒令市鹿·不可得·為之呼所養者·才擊竹·一最大鹿至·乃殺之·取肉以應命·召所知洪端·共食其餘·經日辛死·咸以為中毒·不知為冤鬼所殺也·洪端說·

陳氏負前夫

陳德應棗侍郎之女·為會稽石氏婦·生一男而石生病·將終·執妻手與訣·曰·我與若相歡·非尋常夫婦比·汝善視吾子·必不嫁以報我·陳氏遲疑不應·石怒曰·好事新夫·無思故主·遂卒·陳氏哭泣悲哀·思慕瘠甚·未幾·其父帥廣東·挈以俱往·憐其盛年為擇婿·得莆田吳璩·陳氏辭不免·遂受幣·既嫁歲餘·忽見其前夫至·罵曰·汝待我若是·豈可以事它人·先取我子·次及汝·至暮而子夭·逾旬·陳氏病亡·陳歡世明說·陳與吳璩善·

李尚仁

王承可銜紹興辛酉歲·提舉浙東茶鹽·公廨在會稽子城東·蓋古龍興寺·承可第三子洵·嘗夢一丈夫衣紫袍來·言曰·我朽骨埋桃樹下·幽魂無所歸·君幸哀我·使得徙葬·洵覺·白其父·視舍旁有巨桃一本·因下穿求骨弗獲·明年八月晦·又夢有通謁右曰·朝請大夫李尚仁·既進·乃向所夢者·俯首慘慙·以舊懇申言·袖詩一紙以贈洵·曰·桃林隱伏厭清芬·去歲幽魂得見君·八十壽齡人未有·一堂丰采世無聞·濟時革弊忠為主·救物哀亡德作恩·白骨可憐埋近地·願公舉手報無垠·洵覺·急燭火筆於簡·會承可將代還·以李君精爽不可負·亟集吏卒·盡西廡之桃下大索·數日無所見·承可躬督畚鍤·復穿尺許·乃得之·有小象梳二已朽·烏巾才餘方寸·骨旁存大釘四·乃遷葬於禹廟後三喬松下·具酒食祭之·吳興莫壽朋儔洛陽朱希真敦儒皆記其事·意以夢中詩為吉祥·後十四年·洵以事謫廣東·而廣東自有寓客曰李尚仁雲·

段辛亥

段辛者居婺州浦江縣僧舍·其妻嘗觀於門·有婦人行丐·年甚壯·詢其姓氏始末·自云無夫·亦無姻戚·段妻雲·既如是·胡不為人妾而乞食·肯從我乎·曰·非不欲也·但人以其貧賤·不肯納耳·若得供執爨之役·實為大幸·遂呼入·令沐浴與更衣·遣庖者教以飲膳·旬日而能·繼以樂府訓之·不逾月皆盡善·調習既久·容色殊可·觀段名之曰鶯鶯·以為側室·凡五六年·唯恐其去·一夕已夜分·段氏皆就寢·有自門外呼聞者曰·我鶯鶯夫也·僕曰·鶯鶯不聞有夫·縱如爾言·俟天明來未晚·何必中夜為·其人頗怒·曰·若不啟門·我當從隙中入·僕大恐·即叩堂門·以其事語段·鶯鶯聞之·若有喜色·曰·他來也·亟走出·段疑其竄·自篝火追至廳廂·但聞有聲極響·燈即滅·妻遣婢出視·段已死·七竅皆血流·外戶扃鑰如故·竟不知何怪·浦江人何叔達說·予得之程資忠·

竇道人

桂鎮·字彥粟·信州貴溪人·所居至龍虎山才三十里·道流日過門·桂氏必與錢·鎮素病疴·每作皆瀕死·醫者教以從方士受服氣訣·故尤屬意·紹興庚申六月二十有三日·晚浴畢·散步小徑·有老道人來·年八九十矣·鬢須皓然·曲偻豐下·鎮揖與語·曰·請至弊廬·取湯茗之資·曰·日已暮·不可至君家·君苟有意·能延我旬日否·鎮不應·遂行·復回首·呼鎮使前·入林間·坐古松根上·自云姓竇氏·聲音如山東人·劇談良久·語頗侵鎮·鎮見其老·雖貌敬而心不平·細視其目·清聳入鬢·著青幅巾·暑行不汗·未忍遽去·復詢以氣術·道人曰·吾行氣二百年·治病差易耳·為誦所習書千餘言·天文·地理·兵法·道要·錯綜其間·略不可曉·鎮曰·先生幸教我·此非我所能·蓋言其粗者·道人曰·汝似可教·吾有一編書·藏衡山中·今往取之·又三十三年·當以授汝·鎮曰·得非般運導引訣邪·曰·未也·姑以方濟眾·稍儲陰功·鎮曰·萬一及期·尋先生何所·曰·非汝所知·吾當來訪汝·遂邀鎮欲偕逝·鎮以親年高及孳累為解·道人不憚問忽不見·鎮且駭且懼·急歸不敢語人·後數日·一道者及門問曰·八十三承事何在·鎮之父家人辭以出·呼者怒曰·吾非有所求·先生使來授公書耳·胡為不出·擲卷於階而去·取視之·乃呂洞賓傳也·鎮始悔之·至壬戌年·擢第調鄱陽尉·歸至嚴衢間·疾大作·不可有·輿行數里·必下·投逆旅中·傍外戶而臥·有商人過·倚擔問曰·官人有疾邪·曰·然·曰·始發時行坐立臥皆不可·某處最痛·祈死不能·證候若是否·曰·然·爾何以知之·客曰·某豫章人也·少亦病此·今日負百斤而不害·蓋有藥以療之耳·遂解囊如有所索·得一裹如細剉桑葉者·教以酒三升浸服之·鎮素不飲·未敢服·以千金謝客而行·及家疾益甚·遍服它藥皆弗驗·姑如客言·以藥投酒中·甫酌一杯·其甘若飴蜜·隨渴隨飲·至曉而酒盡·病瘳什八·信宿脫然·後不復作·細思商人·乃昔所遇竇君也·

祝大伯

桂鎮祖安時·自少慕道·年二十有四·即委妻子·挈金帛之名山·十載而歸·遇方士過門·必延入·日飯堂上者數十輩·家貲枵然·盡室尤之·而安時執意愈篤·野僕祝大伯·服薪水之勞·愚鈍而謹飭·一日自外至·舉措異常·曰·適遇道人與我藥·服之能不食矣·驗之信然·詰其方無有也·或盛夏暴烈日中·冬覆冰上·皆不寒暑·而隸役如故·桂氏之人皆敬事之·呼為祝仙人·欲延以客禮·辭曰·吾合在人間為僕使·歲滿自當去·如是三年·告安時曰·白花香有人見招·願主翁同往·乃俱行·未至岩下·絲竹之聲·泠泠盈耳·彩雲鬱然·蔽覆山谷·安時歎異未已·祝君遽聲啞辭·遂不見·安時自是不意以至捐館·時大觀二年也·白花香去桂氏所居十里·

鄭氏得子

李處仁者·亦貴溪人·妻鄭氏·嘗夢至高山下·有綠衣小兒戲於顛·急抱取得之·遂寤·已而有娠生男·命之曰嵩老·稍長·極雋敏·父命習進士業·即名嵩·字夢符·年十八歲·紹興十五年·一舉擢第·後五年·為建州建陽尉·盜入其邑·重親皆死焉·鄭夢亦非吉也·三事桂鎮說·

邵南神術